

Powšitkowne WOZJEWJENJA

njedźelu, 6. januara 2013

TCM – „Łužica pomha“ prosy wo šćedriwe dary

Towarstwo Cyrila a Metoda z.t. (TCM) chce ze swojej lětušej pomocnej akciju „Łužica pomha“ twar domu za cyrkwinski sobudźelačerjow w Marksu a džělo rjadnicow w Albanskej podpěrać. Wobej projektaj buštej njedźelu, 11. nowembra, w Katolskim Posole nadrobnje předstajenej. TCM prosy wěriwych wo šćedriwe dary na konto Cyrill-Methodius-Verein, kontowe čisło 828 23 66, BLZ 750 90 300 pola banki LIGA pod hesłom „Łužica pomha“.

J. Špitank, předsyda TCM

Hodowny koncert w Chróśćicach

Tradicionelny hodowny koncert Chróśćanskeho cyrkwinskeho chóra z instrumentalistami a solistami wotměje so njedźelu, 6. januara, w 14 hodź. w tamnišej wosadneje cyrkwi. W swojim programje zanjese spěwarki a spěwarjo mjez druhim Pastoralnu mšu českeho komponista Jakuba Jana Ryby.

„Hdyž rentnarjo zapřimnu“

Serbska lajska dźiwadłowa skupina Chróśćicy z.t. přeprošuje wšitkich zajimcow na přichodne předstajenje kriminalneje komedije „Hdyž rentnarjo zapřimnu“. Wone budu njedźelu, 6. januara, w 16 hodź. w Njebjelčanskej „Bjesadze“, sobotu, 23. februara w 15.30 hodź. w Chróśćicach a posledni raz njedźelu, 24. februara, w 15.30 hodź. w Radworskej „Meji“.

Kubłanskej dnjej

Pod hesłom „Žiwjenje je krasne – wo lubosći a druhich wěcach“ přeprošuje dekanatne dušepastyrstwo šulerki a šulerjow 7. a 8. lětnika wot pjatka, 18. januara, we 18 hodź. do soboty, 19. januara, w 16 hodź. do Don Boskoweho domu we Worklecach. Zajimcy njech so prošu hač do pónđzele, 14. januara, pod telefonowym čisłom (03 57 96) 8 87 07 we Worklecach přizjewja.

Poskitk křižerjam

Křižerjo móža sej hač do kónca januara pola krawcowskeje mišterki Petry Kupcyneje we Worklecach cylindry k jutram skazać, telefonowe čisło (03 57 96) 9 56 04. Tež wšelake pisane jutrowne banty a rukajcy ma serbska šwalča na wuběr.

Zhromadne posćenje

Sonja Hrjehorjowa poskićuje tež lětsa w Sulšecach zhromadne dny posćenja. Prěni kurs – přewažnje němsce – započnje so wutoru, 26. februara, a skónči so pónđzelu, 4. měrca, z łamanjom posćenja. Druhi kurs – přewažnje serbsce – budže wot srjedy, 6. měrca, hač do wutory, 12. měrca. Naprašowanja a přizjewjenja su móžne hač do srjedy, 20. februara, pola Sonje Hrjehorjoweje, Sulšecy 42, 02997 Kulow, telefonowe čisło (03 57 25) 7 05 60.

Pěši do Częstochowy

Tež lětsa pozbudža farar Beno Jakubaš, so w serbskej skupinje na putnikowanje z Warszawy do Częstochowy podać. Hić smě kóždy sobu, kotryž je 18. žiwjenske lěto docpěł. Termin putnikowanja je wot 5. do 15. awgusta. Zajimcy njech so bórže přizjewja pola fararja Bena Jakubaša w Njebjelčicach, telefonowe čisło (0 35 78) 30 20 05.